

修訂日期: 2009/04/22 發行日期: 2009/5/9

發行單位: 中華電子佛典協會 (CBETA) <http://www.cbeta.org>

資料底本: 卍新纂續藏經 Vol. 26, No. 514

原始資料: CBETA 人工輸入, CBETA 掃瞄辨識

## No. 514-A 會刻仁王護國般若經疏序

仁王護國般若經者。乃八部般若之結經也。夫般若之談。時長理詣。莫不蕩空釋滯。絕想祛情。良由眾生迷執久固。真性難顯。故佛且不揀善惡垢淨性相。一切訶破。雖真性及妙用不無。而姑云無。直待情忘理喪。纖毫不容。然後引出匿王之間端。高張五忍之法網。婆心徹底。巧運錐鎚。密接通別之初機。淘鎔凡聖之玄路。來至法華開顯。領付家業。點示般若之離相。咸成諸法之實相。究論實相之功。功由般若。般若之要。要當妙悟。故曰無量義者。從一法生。是也。唯我天台智者大師。深愍當來。劫運漸衰。鬪諍堅固。般若緣疎。經云若國欲亂。鬼神先亂。鬼神亂故。即萬人亂。是諸難起。皆應受持講讀此般若波羅蜜多。而護國法要。尤在解說此經。此大師經疏所由作焉。惜乎此疏。盛行海東。中華失傳。昔四明尊者。搆仁王疏而弗獲。亦猶天台大師拜楞嚴經而未得。先後求法。苦心有同揆歟。幸有宋老僧如恂師。得之海賈。晁說之敘於簡端今龍藏雖載。而講筵無聞。適天台敏老法師。應吳門諸縉紳請。於戊戌冬。住報恩北寺。時值邊疆多故。臣民不安。乃於己亥春。屬成蓮演講仁王護國般若經。求佛保安。惟成蓮所講。係當世通行唐不空譯本。而大師所疏。為何公譯本。經文互有異同。大旨正堪補備。且龍藏本。經與疏各自為帙。研究維艱。爰遵天台大部之軌。華嚴三合之例。分經會疏。合鑄方冊。排科文於經前。繫疏解於經後。重加句讀。庶幾條分縷析。開卷瞭然。成蓮復據北藏。校勘一周。合掌恭敬。而說頌曰。

般若如虛空	功德不可量	付囑諸國王
依教而信受	菩薩金剛手	承佛威神力
一聞說是經	頃刻為護持	能令其國界
無復諸災難	疾疫與刀兵	一切悉消除
法施利羣生	同發菩提心	

時在光緒二十六年荷月普門示現日 台宗後學比丘成蓮敘於吳門報恩北寺之西齋